

Pinngortitaleriffik pillugu Inatsisartut inatsisaat

Kapitali 1

Siunertaa suliassaalu

§ 1. Pinngortitaleriffik, Kalaallit Nunaanni Nammi-nersornerullutik Oqartussat pinngortitamik ilisimatusarneranni qitiusoq, siunertaqarpoq Kalaallit Nunaanni eqqaanilu pisuussutininik uumassusilinnik nungukkiartuutaanngitsumik atuinissamut ilisimatuussutsikkut tunngavissanik pissarsiniarnermik kiisalu avatangiisinik uumassusillillu amerlalluinnartuunerinik isumannaarinninnissamik.

§ 2. Pinngortitaleriffiup suliassarai

- 1) pisuussutit uumassusillit atuiffigineqarnerannut nungutsaaliorneqarnerannullu tunngatillugu paasissutissanik katersissalluni, suliareqqiisassalluni naliliisassallunilu,
- 2) pisuussutit uumassusillit Kalaallit Nunaannut pingaaruteqartut naliliiffiginissaat siunertaralugu ilisimatusarnerit ingerlatissallugit,
- 3) pinngortitami allanngortiarnerit uumassusillillu avatangiisinut ataqatigiinnerisa misissuiffigineqarnerinut peqataassalluni,
- 4) sakkut periutsillu naliliiffigineqarnerinut atatillugu misissuinerit ineriartortitsinermilu peqataassalluni,
- 5) ilisimatusarfigisassatut taaneqartut iluanni Kalaallit Nunaata nunanut allanut pisussaaffii isumagissallugit aamma
- 6) ilisimatusarnerit aammalu ilisimatusarfinnit allanit misissuinerit ilisimatusarnerillu inernerinik nalunaarsuinerit, Kalaallit Nunaanni pisuussutininik uumassusilinnut aairanalu kalaallini avatangiisinik pinngortamillu isumannaallisaanernut pingaaruteqartut ataqatigiissaarneqarneri isumagissallugit.

§ 3. Pinngortitaleriffik Nairaninersornerullutik Oqartussanut pinngortitaleriffiup suliassaasa iluini siunnersuisassaaq.

Imm. 2. Pinngortitaleriffik pisortat namminersortullu suleqatigiiffinik suliffeqarfinilluunniit allanik sullissisinnaavoq tamakkiisumik ilaannakortumilluunniit tamatumani aningaasartuutaasut akilersillugit.

§ 4. Pinngortitaleriffik pisussaavoq ilisimatusarnermini angusat tamanut saqqummiunnissaannut.

Imm. 2. Pinngortitaleriffik suliassaqaqfimmi iluani apeqqutit avatangiisinut, pinngortitamut ilisimatusarnermullu tunngasut pillugit tamanut ingerlatitseqqittarnermut paasissutissiisarnermullu peqataassaaq.

Kapitali 2

Pinngortitaleriffiup siulersorneqarnera

§ 5. Pinngortitaleriffik siulersuisunit pisortamillu siulersorneqarpoq.

Imm. 2. Siulersuisut suleriaasissartik namminneq aalajangersassavaat.

Imm. 3. Siulersuisut ilisimatusarnermut siunnersuisartutut ataatsimiititaliaqartinneqassapput.

§ 6. Siulersuisut qulliunerusumik siulersuineq akisussaaffigaat, tassunga ilanngullugu Pinngortitaleriffiup siunertatut aalajangersakkat naapertorlugit sulinissaa.

Imm. 2. Siulersuisut ilisimatusarnermut siunnersuisartutut ataatsimiititaliaq isumasioreerlugu piffissaq ungasissoq isigalugu Pinngortitaleriffiup suliniuteqarfigisassanut pilersaarutai aamma ukiumut suliasatut pilersaarutai akuersissutigisassavai.

Imm. 3. Siulersuisut tassaapput siulittaasoq ilaasortallu arfineq marluk, tamarmik ukiuni pingasuni atuuttussatut toqqarneqartut.

Imm. 4. Siulittaasoq ilaasortallu pingasut Naalakkersuisunit toqqarneqassapput, ilaasortat marluk soqutigisaqaqatigiiffinnit naalakkersuisunit toqqarneqartunit toqqarneqassallutik ilaasortallu marluk Pinngortitaleriffimmi suleqataasunit taakkulu akornannit qinerneqassallutik.

§ 7. Pisortap Pinngortitaleriffiup ulluinnarni siulersorneqarnera isumagisassaraa avammullu sinniisutut atuutissalluni.

Imm. 2. Pisortaq Naalakkersuisut toqqartassavaat siulersuisut oqaaseqartereerlugit.

§ 8. Ilisimatusarnermut siunnersuisartutut ataatsimiititaliaq tassaavoq siulittaasoq ilaasortallu arfineq pingasut tamarmik ukiuni pingasuni atuuttussatut toqqarneqartut.

Imm. 2. Siulittaasoq Naalakkersuisunit toqqarneqassaaq Pinngortitaleriffiup siulersuisuisa inassuteqarnerisigut. Ataatsimiititaliami ilaasortat sinneri ilisimatusarfinnit, siulersuisut saaffiginninnerisigut, toqqarneqassapput.

Imm. 3. Ataatsimiititaliaq suliasat ungasissumut pilersaarusiugaasut suliarinerini akuersissutigineqarnerinilu siunnersuisassaaq.

Imm. 4. Ataatsimiititaliap akuttunngitsunik Pinngortitaleriffiup ilisimatusarnikkut suliai naliliiffigisassavai. Naliliinerit Pinngortitaleriffiup aqutsisinut sulisuinullu saqqummiunneqartassapput.

§ 9. Naalakkersuisut Pinngortitaleriffiup aquune-qarnera aaqqissuussaaneralu pillugit maleruagassanik erseqqinnerusunik aalaj angersaasinnaapput.

Kapitali 3

Aalajangersakkat allat

§ 10. Pisortaq ukiumut ataasiarluni Pinngortitaleriffiup ingerlatai pillugit Naalakkersuisunut nalunaarusiortassaaq.

§ 11. Pinngortitaleriffiup inatsisinik tunngaveqartunik suliasaanut ukiumoortumik aningaasaliissutit aningaasanut inatsisikkut aalajangersarneqartassapput.

Imm. 2. Inatsisinik tunngaveqanngitsunik suliassanut aningaasaateqarfinnit avataanillu allanit aningaasaliissutit Pinngortitaleriffimmit allanit akuliuffigineqanngitsunik atorneqarsinnaapput.

Kapitali 4

Atuutilerneranut ikaarsaariarnermilu aalajangersakkat

§ 12. Siulersuisunik siullermeersumik qinersinermi ukioq ataaseq affarlu atuuttussamik ilaasortat marluk Naalakkersuisunit toqqarneqassapput, ilaasortaq ataaseq soqutigisaqaqatigiiffinnit ilaasortarlu ataaseq Pinngortitaleriffimmi sulisunit toqqarneqassallutik.

Imm. 2. Ilisimatusarnernut siunnersuisartutut ataatsimiititaliamut ilaasortassanik siullermeersumik toqqaanermi ilaasortat affai ukioq ataaseq affarlu atuuttussamik toqqarneqassapput.

§ 13. Inatsit atulerpoq 1. juli 1994-imi.

Namminersornerullutik Oqartussat, ulloq 8. juni 1994.

Lars Emil Johansen

/

Ove Rosing Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut